

請囑請罷職崇陵叅奉黃琮蒙駮昏劣全不識字請汰去世子並不從○承旨
入對于東宮○壬申冬至使趙道彬副使趙榮福書狀官申哲等如清國○承
旨入對于東宮○命立風雲雷雨壇於濟州先是濟州自設郡初有風雲雷雨
壇自本州致祭牧使李衡祥以為非州官所可私祀者狀聞罷之其後島中連
年飢荒癘疫不息州民以為崇在壇祀之罷革訴于今牧使鄭東後請復而東
後聞于朝至是禮曹覆奏請許之世子從之自是歲自京師下送香祝以祀之
○癸酉憲府申前達世子只從黃琮事○承旨入對于東宮○甲戌流星出奎
星下入南方○以韓世良為承旨李喜朝為吏曹叅判○承旨入對于東宮○
乙亥憲府申前達世子只從趙尚慶洪重聖削版事黃一夏令遞其職○承旨
入對于東宮○丙子西方有氣如火光○以李宏為承旨鄭濬為大司憲閔鎮
厚為右叅贊李光佐為京畿觀察使○憲府申前達又言清州討捕使柳鵬章
目不識丁政委下吏請罷職日昨假注書之望以新及第柳得章備擬得章以
逆黨即柳然之孫為世所棄不可以其祖之倖復官爵視同平人請當該承旨注
書推考宗廟副奉事朴光世本以鄉曲鄙瑣圖占鄉薦濫通仕籍居官行已不
似官負貌樣請汰去世子不從○戊寅世子引接大臣備局諸宰領議政金昌